

verba indicativi aut præteriti temporis exprimuntur, v. g., *excommunicamus, sit excommunicatus; ipso facto, ipso jure, ex tunc, auctoritate nostra, virtute præsentium sit excommunicatus, suspensus*, etc. Ad eas tamen subeundas requiritur, in duplo casu, sententia declaratoria; nempe 1º si pœnæ sint graves et activæ, id est, requirant ex parte puniti actionem faciendam aut sustinendam; 2º si boni vel juris plene possessi sint privativæ, nisi lex aut consuetudo contrarium expresse dicat, quod raro accidit, exceptis censuris. Hæc autem non requiritur sententia si pœnæ sint passivæ, vel juris primo acquirendi privativæ, aut activæ, sed leves, vel conditionales. Ita *Vernier*, t. I, p. 427.

Certum est leges quæ decernunt pœnas ferendæ sententiæ, ad pœnam subeundam ante sententiam judicis non obligare: talis quippe est intentio legislatoris. Hinc qui præceptum communionis paschalis omisit, non ideo est excommunicatus.

Difficultas igitur circa pœnas latæ sententiæ versatur. Duplicis generis iterum sunt hujusmodi pœnæ; aliæ enim sunt passivæ quæ ab ipsa lege, sine concursu vis externæ, infliguntur, v. g., censura, irregularitas, inhabilitas ad aliquid faciendum; et aliaæ activæ, quæ in execuzione a vi extrinseca pendent, ut occisio, mutilatio, incarcratio, bonorum privatio, etc.

Pœnæ prioris generis ante sententiam judicis obligant in conscientia, ut nemo diffitetur.

Pœnæ activæ etiam duplicis naturæ esse possunt, leves scilicet et graves.

Humani legislatores obligare possunt ad pœnas leves statim subeundas, v. g., ad quædam mortificationis opera in monasteriis, non autem ad subeundas in conscientia et ante sententiam judicis pœnas graves: nam imperare nequeunt aliquid nimis grave, ubi bonum publicum id non expostulat: porro hujusmodi pœnas sibi infligere, est aliquid nimis grave, imo sæpe crudele et legi naturali oppositum: bonum autem publicum pariter obtinetur si ab agente externo infligantur: ergo.

Unde reus juste damnatus non tenetur, non solum se occidere, se mutilare, sed nec ad carcerem ire, bonis se exscoliare, etc. Sed contra justitiæ executores decertare, eos pœnis vel injuriis afficere non potest, quia ipsorum officium est sic agere, et repugnat dari jus juri oppositum. Si vero per industriam et sine alterius detimento fugeret, peccati reus sub hoc respectu non videretur; pœna enim gravior est ut teneatur eam subire, quando sine illius detimento illam declinare potest.

Qui autem per sententiam judicis damnatur ad mulctam vel ad compensationem, eam statim solvere debet.

Quæritur an ignorantia excusat a pœna lege statuta.

Notandum 1º ignorantiam cadere posse in legem simul et in pœnam, vel in pœnam tantum.

Notandum 2º ignorantiam invincibilem legis excusare a pœna; excusat enim a culpa: ergo *a fortiori* et a pœna quæ ob culpam decernitur.

Notandum 3º ignorantiam, non ab omni culpa, sed a culpa mortali excusantem, simul a pœna gravi excusare; nam pœna gravis semper supponit culpam gravem; æquitati repugnaret talem pœnam ob culpam ex omni parte levem incurri.

R. 1º. Ignorantia a gravi culpa non excusans, a pœna lege imposta regulariter non excusat; qui enim voluntarie ponit causam pœnæ, pœnam contrahere debet: at culpa gravis contra legem, est causa pœnæ lege imposta: ergo. Unde ignorantia crassa a pœna non excusat.

Diximus regulariter; nam si legislator scientiam requireret, dicendo, v. g., *qui scienter vel temere hoc fecerit*, etc., ignorantia etiam crassa excusaret, quia talis esset intentio legislatoris; non vero ignorantia affectata quæ temeraria foret et scientiæ æquivaleret.

R. 2º. Ignorantia etiam invincibilis solius pœnæ a pœna non excusat, excepta tamen censura; cum enim hæc ignorantia a gravi culpa non excusat, causam pœnæ non tollit: ergo nec pœnam. Excipitur tamen censura, quia ex intentione Ecclesiæ minantis, hæc pœna contumaciam semper supponit: ignorantia autem invincibilis

aut leviter culpabilis pœnæ contumaciam impedit: ergo.

Petitur an, ubi res aliqua prohibetur lege divina et lege humana pœnali, ignorantia solius legis humanæ a pœna excusat. *P. Antoine*, t. II, dicit sibi videri talem ignorantiam regulariter a pœna non excusare, quia culpam non tollit: unde infert rebaptizantem fieri irregularem ex delicto, licet legem ecclesiasticam hoc prohibentem invincibiliter ignoret, modo legem divinam cognoscat aut invincibiliter tantum ignoret. Probabiliter nobis videtur hanc ignorantiam a pœna excusare; tollit enim culpam contra legem humanam; pena autem sola lege humana statuitur: ergo.

ARTICULUS TERTIUS.

DE LEGE IRRITANTE.

Leges irritantes sunt illæ quæ statuunt quosdam actus fore nullos, seu invalide contrahendos. Duplicis sunt generis: aliae quæ actum ipso jure nullum efficiunt, v. g., matrimonium clandestinum; et aliae quæ decernunt actum his aut illis formalitatibus destitutum rescindi posse, ut, v. g., contractus minorum in ipsorum detrimentum initios.

Certum est 1º leges quæ statuunt actus rescindi posse, eos ante sententiam judicis non irritare. *Patet ex terminis*. Unde qui bona fide cum minori contraxit, contractu illo uti potest, donec per sententiam judicis rescindatur.

Certum est 2º contractu per sententiam judicis rescisso, uti non licere, quia potestati legitimi mæ expresse jubenti resistere non licet.

Quæstio igitur de sola lege ipso jure irritante moveri potest. Ad quam solvendam, dicimus leges quæ personas inhabiles reddunt ad aliquid faciendum, dandum aut recipiendum, obligare in conscientia, ante sententiam judicis; nam talis est evidenter legislatoris intentio: porro dici non potest legislatorem non habere potestatem hujusmodi actus irritandi; hæc quippe potestas ad bonum

publicum necessaria est, et apud omnes populos semper agnita fuit: ergo.

Hinc matrimonium cum impedimento dirimente contractum, radicitus est nullum. Ita titulus beneficii per simoniam acquisiti: sic et nunc donatio inter personas inhabiles aut portionem lege permissam excedens.

Quæritur an ignorantia excusans a culpa, excusat pariter a nullitate actus.

R. Excusaret utique si irritatio per modum pœnæ et in vindictam culpæ statueretur, *ut patet ex dictis*. Verum si statuatur ob bonum publicum, ignorantia, quantumvis invincibilis, a nullitate actus non excusat. *Ita omnes theologi et jurista*. Tunc enim objectum, cui apponitur irritatio, est ipsem actus, vel in se spectatus, vel a tali persona initus: porro objectum istud subsistit independenter a culpa, ignorantia aut bona fide agentis: ergo. Unde qui aliquid in bona fide a persona inhabili accepit, hoc, errore detecto, restituere tenetur.

Metus gravis ab irritatione actus non magis quam ignorantia excusaret, propter eamdem rationem.

ARTICULUS QUARTUS.

DE LEGE DUBIA.

Multipliciter lex potest esse dubia, ut videre est apud *Concina*, t. VI, et *S. Ligorium*, l. I, n. 97, maxime autem ratione existentia et ratione sensus, si videlicet dubitetur an existat et an hoc vel illud sub ea continetur.

Si dubium circa existentiam legis moveatur, tota Probabilistarum turba contendit illam, post adhibitam sufficientem diligentiam ad inveniendam veritatem, non obligare, secluso scandalo vel alio notabili inconveniente; ratio eorum est quod homo possideat libertatem qua privari non potest nisi prohibitione clara et certa.

Contra vero si de existentia legis constet, dubitetur autem ad aliiquid extendatur, an recepta sit, an desierit, an justa sit, etc., plerique eorum volunt eam obli-

gare; nam, inquiunt, lex possidet: igitur melior est ipsius conditio.

Nos, cum sanioribus theologis, sequentia breviter statuimus.

I. Si de actione personali agatur, v. g., de implenda pœnitentia, de officio recitando, etc., in vero dubio partitur, id est, quæ a peccato magis removet, est eligenda: nam 1º non licet periculo peccandi se exponere; 2º ubi de sensu vel de justitia legis agitur, volunt plerique adversarii in favorem superioris præsumendum esse: ergo et ubi de existentia legis agitur; ad id enim semper reducitur dubium nempe an aliquid sit præscriptum vel prohibitum, nec non; 3º falsa est ratio Probabilistarum: statim enim atque de existentia legis dubium proprium dictum mihi advenit, v. g., de impositione pœnitentiae, non certe possideo meam libertatem; sed de illa dubito, perinde ac si de impletione rei certo præscriptæ ageretur. Ergo.

II. In materia justitiae, si de existentia vel solutione debiti, v. g., tributi, dubium exsurget et deponi nequeat, res ad summum pro ratione dubii dividenda est, juxta quod docemus in Tr. de Restitutione, et probabilius retineri potest donec constet eam esse debitam, juxta axioma juris: *In dubio melior est conditio possidentis.*

III. Quando agitur de pœna, in dubio, *benignior interpretatio est facienda.* Est regula 49 juris canonici in Sexto. In foro civili sequens pariter admittitur, quæ est n. 57 in jure Cæsareo: *Semper in dubiis benigniora sunt præferenda.* Unde adhuc regula canonica 15: *Odia restringi et favores convenit ampliari.* Eo sensu omnes judices, tum ecclesiastici, tum sacerdotes, ipsique Romani pontifices semper interpretati sunt leges pœnales: ergo sic intelligendæ sunt. Unde qui serio dubitat an excommunicatio lata sit contra lectores librorum hæreticorum, an sit late aut ferendæ sententiæ, an talis liber sit hæreticus, an illum legerit, judicare potest se non esse excommunicatum. Si vero de censura certus esset et de validitate absolutionis dubius, habendus foret ut censura

notatus. Ita S. Ligerius, l. 7, n. 67, et plurimi apud eum.

Cæterum, in his omnibus recurrendum est ad principia circa conscientiam dubiam et circa conscientiam probabilem a nobis superius posita.

ARTICULUS QUINTUS.

DE PROMULGATIONE LEGIS.

Promulgatio legis est ipsius manifestatio eo modo facta ut communitati innotescat. Omnes fatentur promulgationem necessariam esse ut lex vim obligandi habeat; est enim regula quam subdit observare tenentur: at repugnat eos teneri observare regulam quam noscere nequeunt. Ergo. Ita S. Th., 1 2, q. 90, art. 4, et cum illo cæteri.

Non requiritur ut lex positiva singulis privatis innotescat; sufficit quod in communitate publica fiat, et unusquisque eam cognoscere moraliter possit.

Lex æterna, quatenus in mente Dei concipitur, promulgari non potest, et sic rationem legis perfectæ non habet. Est tantum ordo essentialis, quo cæteræ fundantur leges, quæ ultimate promulgatione constituuntur.

Lex naturalis per lumen Dei in cordibus nostris impressum et omnibus traditione manifestatum promulgatur; lex divina promulgata est modo interna inspiratione, ut accedit respectu Prophetarum, modo per externam solemnitatem, ut lex Moysis in monte Sinai, et lex Evangelica in festivitate Pentecostes.

Lex humana, sive ecclesiastica, sive civilis, externa promulgatione necessario indiget: modus autem est arbitriarius et a voluntate legislatoris pendet. Ubi tamen statutæ vel usu introductæ sunt regulæ, observari debent donec legitime eis derogatum fuerit, alioquin lex sufficienter promulgata non censeretur, et, licet optime nota, non obligaret.

Justinianus statuerat, per *Novellam 66*, leges imperia-

les in singulis provinciis promulgandas fore, et non nisi duobus mensibus post promulgationem obligaturas.

In Gallia nunc promulgatio fit ab ipso Imperatore, per decretum, quod in tabulis legum (*Bulletin des lois*) inseritur. Lex sic promulgata coepit obligare in tota præfectura in qua Imperator tunc residet, prima die post diem promulgationis, et in aliis præfecturis Imperii, eadem die, cui una additur dies pro decem myriametris (*vingt lieues environs*) inter locum promulgationis et capitalem urbem præfecturæ. Unde Cenomani quarta die tantum obligat lex Parisiis promulgata.

Si tamen Imperatori videatur expedire promulgationem legis aliquo casu vel loco accelerari, mandare potest præfecto ut decretum promulgationis ipsamque legem statim imprimi et publicis locis affigi provideat: ex hac autem publicatione lex suum sortitur effectum. (*Ordonnance du 18 janvier 1817*, art. 1 et 2.)

Major est difficultas quoad modum promulgandi leges ecclesiasticas. Plerique doctores Itali aliique extranei non pauci contendunt promulgationem Romæ factam, per affixionem publicam in campo Floræ, sufficere ut lex vim habeat obligandi omnes qui notitiam ejus habuerint, saltem duobus post promulgationem istam mensibus. Rationes eorum sunt: 1º auctoritas pontificum Romanorum qui sic obligare possunt et volunt: possunt, cum modus promulgationis, juxta omnes, sit arbitarius: volunt, præsertim quando expresse dicunt, ut dicere solent, se intendere constitutiones sic publicatas ab eis ad quos spectant perinde habendas esse ac si unicuique eorum personaliter intimatae fuissent, vel exhibitæ, ostensæ, etc.; 2º numerus doctorum hanc defendantium sententiam, quam *S. Ligoriu*s, l. 1, n. 96, exhibet ut valde communem et probabilem. Docet tamen idem *S. Ligoriu*s, et plurimi cum illo, leges Pontificias non obligare etiam Romæ, nisi elapsis duabus a promulgatione mensibus, quia ubi tempus a Pontifice non determinatur, sequenda est dispositio Justiniana.

Juxta hanc sententiam, lex sufficienter publicata Ro-

mæ, universos fideles etiam invincibiliter cam ignorantes, in *actu primo* obligat, quatenus eos in verbis suis complectitur, non vero in *actu secundo* eos obstringit, eo sensu quod adversus illam peccent aut pœnam incurvant, donec in *notitiâ* illorum devenerit. At in nonnullis casibus particularibus episcopus intelligens Sedis Apostolicæ legem in sua diœcesi noxiū producturam esse effectum, non modo suas rationes Romano pontifici exponere non prohibetur, sed ad id omnino tenetur, ut ait *Bened. XIV*, de *Synod. diœces.*, l. 9, cap. 2, n. 3, ubi docet, n. 4, episcopum teneri parere judicio Sanctæ Sedis a se invocato.

Verumtamen Galli aliique multi volunt leges Pontificias Romæ promulgatas non obligare, nisi promulgatae fuerint in diœcesibus per episcopos, vel usu receptæ sint; 1º quia saltem ubi Pontifex statuto juris civilis expresse non derogat, illius dispositionem sequi censetur, juxta hæc juris canonici verba: « *Sicut leges non dedignantur sacros canones imitari, ita et sacrorum statuta canonum principum constitutionibus adjuvantur.* » Decretal. l. 5, tit. 32, cap. 1. 2º *Pius IV* in Bulla *Sicut ad sacrorum*, ad observanda decreta Concil. Trid., ait: « *Jure communi sanctum est ut constitutio novæ vim non nisi post certum tempus obtineat.* » 3º Necessæ est legem communitati innotescere: at in diœcesibus convenienter non innotescit, nisi ab episcopis promulgetur. 4º Consuetudo est in Gallia, ab immemoriali tempore, ut Pontificiæ constitutiones ad disciplinam spectantes, non obligent nisi ab episcopis promulgatae fuerint. Ergo. Ita, præter Gallos, *Wigers, Boudart, Steyaert, Billuart, Dens*, etc.

Dens notat hanc sententiam varia tollere incommoda: v. g., 1º lex irritans, Romæ tantum promulgata, in priori sententia actus ubique redderet nullos, licet invincibiliter ignorata; non sic in posteriori opinione. 2º In priori sententia, non omnes eodem tempore obligantur, sed unus post alium, prout notitiam acquireret; in posteriori vero, omnes simul obstringuntur. Ergo sum-

mus Pontifex, quando exsecutionem legis non urget, eam prudentiae episcoporum relinquere merito judicatur. « Si praxis communis spectetur, inquit *Concina*, » leges conciliorum et Pontificum consueverunt promulgari in singulis diœcesibus. »

Dicimus ad *disciplinam spectantes*, nam definitiones Romani pontificis in materia fidei et morum statim obligant ac innotescunt, juxta quod docuimus in Tr. *de Ecclesia*, et hic tantum indicamus; idque independenter ab opinione theologica circa ipsius infallibilitatem; siquidem ratione dignitatis tenetur omnes docere et pascere, et omnes eum audire debent ut primarium pastorem.

1º Certum est tamen apud nos Romanum pontificem, vi supremæ potestatis suæ, posse exigere ut lex Romæ promulgata, statim obliget in omnibus provinciis, et etiam ut lex universalis circa disciplinam in omnibus provinciis vigeat, non obstantibus localibus consuetudinibus.

2º Certum est, quoad Galliam in specie, summos Pontifices consuetudines omnes juri communi contrarias non admittere, ita ut nullo modo credendum sit quod si tūd jus commune aut quævis Apostolica Constitutio, cum sit his consuetudinibus opposita, eo ipso robore caret in Gallia. Licet enim summi Pontifices contra hasce consuetudines non semper potuerint reclamare, ob gravia incommoda, sive publica, sive personalia sibi aut aliis, hoc tamen silentio easdem consuetudines ratas non habuisse credendum est. Jam Sancta Sedes mentem suam aperuit tum in specie circa obligationem bullæ S. Pii V de liturgia Romana, tum in genere, circa Pontificias constitutiones disciplinam generalem spectantes, quas admitti ius sit a concilio provinciæ Parisiensis anni 1849, ut videre est in actis ejusdem concilii.

3º Certum est tamen mentem Sanctæ Sedis non fuisse omnes consuetudines diœcesibus Galliæ proprias penitus destruere.

4º Quænam vero juris communis aut conciliorum generalium decreta, quænam Apostolicæ Constitutiones vim

legis habeant, et quænam consuetudines supremi legislatoris consensu in diœcesibus ratæ habendæ sint, in dubio ad Sanctam Sedem recurrentum est.

Episcopi suas leges aut statuta synodalia promulgare possunt, vel in sua cathedrali coram populo, vel in synodo, vel per affixionem publicam, vel alio modo, et nullum requiritur temporis intervallum ut vim habeant: certum est referente *Benedicto XIV*, de *Synodo diœces.*, l. 13, c. 4, n. 2, illa statim obligare ac innotescunt.

ARTICULUS SEXTUS.

DE CONSENSU SUBDITORUM.

Communius docetur legem a consensu populi pendere, si populus, eligendo principem, potestatem ejus limitaverit, statueritque legem vim obligandi non habituram, nisi prius fuerit acceptata, ut apud veteres Romanos.

Certum est, in guberniis *repræsentativis*, in quibus populus per conventum legatorum repræsentatur, legem non valere nisi a legatis populi acceptetur, quia potestas legislativa ad solum principem non pertinet.

Sive potestas publica primario in populo resideat, ut multi volunt, sive a Deo immediate procedat, ut alii contendunt, integra remanet quæstio, an scilicet lex ab auctoritate constituta regulariter lata, vim habeat obligandi independenter a consensu subditorum. Negant *Lutherus*, *Caramuel*, et alii plures, contra quos sit

PROPOSITIO.

Lex legitime lata, tum ecclesiastica, tum civilis, vim habet obligandi independenter a consensu populi.

Prob. Scriptura sacra, auctoritate Alexandri VII, et ratione.

1º *Scriptura sacra.* Hic omnes recurrent textus quos

superius citavimus ubi de potestate condendi legem. Constat, ex illis textibus, superiores ecclesiasticos et civiles a Deo constitutos esse ad regendos subditos: ergo nomine Dei imperant, ac proinde subditi tenentur leges eorum acceptare eisque parere. Ergo 1°.

2° *Auctoritate Alexandri VII* sequentem Probabilistarum propositionem damnantis: « Populus non peccat, etiamsi absque ulla causa non recipiat legem a principe promulgatam. »

3° *Ratione*. Inferiores tenentur obedire superioribus aliquid legitime praeipientibus, et in hoc principio totus ordo societatis fundatur: ergo a pari subditi tenentur obedire principibus per leges juste imperantibus. Porro dicere eos teneri obedire, et leges ante liberam acceptationem non obligare, sunt duo contradictoria. Ergo 3°.

Dices 1°: « Leges instituuntur cum promulgantur: firmantur cum moribus utentium approbantur. » Decret. 1^a part., dist. 4, cap. 4. Ergo jus earum obligandi ex approbatione populi pendet.

R. Nego conseq. Nam 1° verba quæ objiciuntur non sunt alicujus concilii aut Pontificis, sed *Gratiōni*; 2° sensus eorum est, quod leges quæ *moribus utentium*, sive *praxi*, approbantur, a periculo abrogationis magis removantur, *ut patet ex contextu*. Ergo.

Dices 2°: Si acceptatio populi non sit necessaria, dari potest lex cui tota communitas aduersetur: atqui hoc repugnat, cum talis lex non in bonum, sed in ruinam esset societatis: ergo.

R. Nego minorem ejusque probationem. Fieri enim potest ut populus furiosis cupiditatibus abreptus, legi justæ et ad bonum societatis institutæ repugnet: patet exemplo Israelitarum adversus Deum murmurantium, Parisiensem supplicio Ludovici XVI applaudentium, etc. Ergo.

Cæterum, si princeps prævidet legem, licet justam et ad bonum commune ordinatam, plus mali quam boni, propter circumstantias, esse allatarum, prudentia suadet ut a premenda executione ejus abstineat: tunc lex illa obligare cessat, non defectu acceptationis in populo, sed

defectu voluntatis in principe. Attamen subditi in actu rebellionis graviter peccant, voluntati principis resistendo, quamvis postea lege non teneantur.

Dices 3°: Principes saltem in origine rerum suam acceperunt potestatem a populo: ergo populum non consentientem obligare nequeunt.

R. 1°. Nego ant., saltem propter suam generalitatem. Nam 1° principes ecclesiastici ab ipso Christo fuerunt constituti. 2° Reges Iudaeorum similiter a Deo suam acceperunt potestatem. 3° In rerum origine, primi reges fuerunt patresfamilias qui jure divino (a Deo enim venit *omnis paternitas in cœlis et in terra*, Ephes. iii, 15) suam gubernabant familiam, qua magis ac magis crescente, facti sunt reges. Sub ultimo hoc respectu habueruntne suam auctoritatem immediate a Deo, an vero ex consensu eorum quos habuerunt ut subditos? Non liquet, et in hoc puncto dividuntur auctores.

R. 2°. Nego conseq. Etiam quando populus elegit principem, jus sibi reservare non potuit leges ejus acceptandi aut non acceptandi: necessario enim voluit ut princeps dignitatem regiam haberet, alioquin regem non constituisset. Porro dignitas regia annexam habet potestatem condendi leges et conscientiam subditorum obligandi; haec potestas, mediante populi electione, ab ipso oritur Deo. Vide quæ diximus in *Philosophia Morali*, de origine societatis politicae, et *cinquième Avertissement de Bossuet*.

Inst. Populus non tenetur parere principibus injusta præcientibus: ergo leges eorum examinare, ac proinde acceptare vel non acceptare potest.

R. Nego conseq. Populus quidem non tenetur parere legibus evidenter injustis, *ut supra diximus*: sed 1° inde jus examinandi omnes leges, antequam ipsis obediatur, nullo modo sequitur; nam tunc turbaretur omnis ordo societatis, ut patet. Requiritur ergo ut examen istud liqueat, quod lex vere injusta appareat et sic aestimetur a viris probis et sapientibus. 2° Insuper, jus examinandi manifeste non inferret ex seipso jus reficiendi leges etiam justas, quod tamen in objectione supponitur. Unde tandem

lex injusta non obligat defectu potestatis in principe, non autem defectu acceptationis in populo.

Dices 4º : Consuetudo legi opposita eam legitime abrogare potest : at talis consuetudo non acceptationi legis aequivallet : ergo.

R. Dist. maj. Consuetudo legi opposita legem abrogare potest, consentiente principe, *conc.*; resistente principe, *nego maj.* Sic non magis abrogatio quam firmatio legis a consensu populi repetenda est. Ergo. *De consuetudine* fuis alibi disseremus.

Quæritur quid sentiendum sit de placito gubernii sine quo constitutiones Pontificiae vim apud nos habere nequeunt.

R. Non solum apud nos, sed in Hispania litteræ Romani pontificis publicari nequeunt quin prius, olim in curiis regiis, nunc in concilio Status, examinatae, recognitæ, et per decretum Imperatoris admissæ fuerint. Ab hujusmodi examine et admissione eximuntur rescripta privata, dispensationes sacræ Pœnitentiariæ, imo et Datariae ad matrimonia contrahenda ; non vero conciliorum generalium statuta.

Certum est 1º bullas et constitutiones Pontificias vim obligandi ab hujusmodi approbatione non ducere ; potestas enim ecclesiastica a potestate civili in iurium suorum exercitio non dependet. Verum ex altera parte summorum Pontificum constitutiones a potestate civili facilissime protegi possunt si ab ea potestate recognitæ fuerint. Hinc tacita introducta est inter summos Pontifices et quædam gubernia conventio, vi cuius Constitutiones Apostolicæ, bullæ et brevia ad rem publicam spectantia, sic recipiuntur ut in foro civili effectum habeant.

Certum est 2º definitiones dogmaticas tali receptione non indigere, ut monuimus. Unde pars dogmatica Conc. Trid., quæ in Gallia civiliter non fuit publicata, omnes nihilominus stricte obligat fideles. Olim tamen constitutiones dogmaticæ et conciliorum decreta examini Parliamentorum subjiciebantur, ut eo modo admissa, vim legis in foro externo haberent. Nunc autem, cum nullus

fidem catholicam profiteri teneatur, definitiones fidei vim legis habere nequeunt, et ideo nulla est ratio cur approbatione civili indigerent.

Certum est 3º alias Constitutiones Apostolicas more consueto non receptas, vim non habere, nisi Pontifex maximus, suprema utens sua potestate, declareret se, non obstante tali consuetudine, obligare velle. Vide quæ diximus pag. 578.

CAPUT TERTIUM.

DE LEGUM HUMANARUM SPECIEBUS.

Sicut duplex est potestas legislativa, ecclesiastica scilicet et civilis, duplex est pariter legum humanarum genus : aliæ sunt ecclesiasticæ quæ jus canonicum, et aliæ civiles quæ jus civile constituunt.

ARTICULUS PRIMUS.

DE JURE CANONICO.

Jus canonicum ita nuncupatur a *canone*, voce græca quæ idem sonat ac regula; definitur : *Jus quo societas christiana ad commune bonum spirituale et ad beatitudinem æternam dirigitur.* Ex divinæ Scripturæ præceptis, conciliorum decretis, summorum Pontificum Constitutionibus et legibus consuetudine introductis coalescit.

Innumeræ prodierunt leges ecclesiasticae variis in temporibus, quarum aliæ universales, aliæ particulares, aliæ fuerunt receptæ, aliæ rejectæ, et multæ varias subierunt mutationes. Unde scientia juris ecclesiastici est immensa et valde laboriosa. Breves tantum hic enucleabimus notiones circa corpus juris canonici, ejus auctoritatem et tribunalia ecclesiastica.